

فاطمه كل عام...تشكر الخدام

لا متنساكم...ياخدمتوا حسين

فاطمه بأخر محرمها و صفرها...اتجازي أصحاب المآتم و الحضرها

لليقدم تعزية اتقدم شكرها...شكراً من الزهرة يا ناس اشكبرها

ينكتب اسمه...ابدفتر الخدمه

ربنه يرعاكم...ياخدمتوا حسين

اتقول يومية جنت للمآتم أسعه...الناعي و الرادود من يقرالي أسمعه

لو بجيتوا بيدي أحسب دمعه دمعه...و الله كل دمعه ابقبركم تضوي شمعه

العبرة لوليدي...توقع بايدي

حاضرة اوياكم...ياخدمتوا حسين

آني ما أنسه الخدم و الباري يشهد...و الصرف درهم ألف مني يتسدد

يا بشر أقسم و حق شيبه محمد...جان يجبر خاطري اللي يلبس أسود

كلشي دين بدين...حته دمع العين

قلبي يهواكم...ياخدمتوا حسين

اليلطم و يترك على صدره علامة...ابها الأثر يتميز بيوم القيامة

ينحشر للجنة بثياب الخدمة...يصير جاري و هذي للخادم كرامة

اللي يخدمه...منزله يمنه

الجنة مأواكم...ياخدمتوا حسين

بالقيامة هناك مجلس عدنه يا ناس...انشوف عاشوراء واقع مو بالإحساس

من نشوف حسين بس منحرج بلا راس...و أنا بالمحشر أشيل اجفوف عباس

ابساحة المحشر...نبجي عالمنحرج

هناك ألقاكم...ياخدمتوا حسين

حسين لمن يندكر لو جانوا اثنين...دوم أصيرن ثالثتهم و أهمل العين

يالتناشد عني وين و مرقددي وين...أنا قبري ابكل قلب ينحب عله حسين

ونتي مخفية...ابكل حسينية

جرحي واساكم...ياخدمتوا حسين